

## 1. Arbosobo Leil Nr Saexl Seir Halleix

Halleix ngo mel Arbosobo leil nr saexl, yar leil ddar-nr-zzi. Ye tor seir car, ca vaer mel bbeix ggie bbejjiur a bbeix: “Merlabbor mel Arbosobo ar ddei zza, niul bei nr sir bei arddeirnga a mel, niul leil dder murggiertiex leilei,” eine bbeix ggie bbejjiur a. Yel almer er arddeirnga a, ngo dder yarzi gexr. Nael ngua dax mel arseir lei neir zi lalnga, Arbosobo leil zi su nr zza, yar leil ddarzzi su lei nr zza. Yel ngo lei Arbosobo ar ddei zza saexl arnar a; yar leil nr zi, yar leil ddar-nr-zzi. Ngo halae camar mel bbeix ggie bbejjiur a bbeix: “Ca mel leil tarmerzziggala kexl arddeirnga a mel, Arbosobo leil ae bbejjiur a saelnei yar niul leil piur var,” eine bbeix ggie bbejjiur a. Yel ngo dder zoxlzoxl a Arbosobo mel niul dax arsae vivi giex dae mel, niul arsae yar leil ae bbejjiur ddo bbeixleir, eine xiar doxr dae.

Nael eilcar ngo Arbosobo leil saexl ho a saelnei saexl. Arbosobo mel niul dax giex vimir dae bbeixarnar a, nael niul yar dax arssor a biar lei yar bbejjiur ddo, niul nixmox zzar xiar ji dae lei yar saexl bbe. Ngo halae camar mel bbeix ggie bbejjiur a bbeix: “Niul meixddur-bexllexr ddir

arddernga a, niul dder meixgel ddei leil jiu gex dae a bbeix: ‘Arbo yaloxlmo; Arbo yaloxlmo, ni ya ddei ngua mi gga ddir a; ngo leil arleixr ggaxr teixl gger la,’ eine ae arddeirnga a, ni meixddur ddei dder kor var,” eine bbeix a. Nael ca mel Arbosobo ar ddei zza saexl arnar a; yar leil zzael nr zi. Cirdaetae a mel, almer lei miur a lei Arbosobo leil hie doxr; almer nr lei a lei Arbosobo leil hie doxr; merni lexl no a lei Arbosobo leil hie doxr. Nael yar niul leil almer lei gger nei merni ddux gger a zzael, arseir lei yar leil nawo su ar ddei nr zza, eine nga.

## **2. Goxrsol-Goxrnaxr Pex Dae A, Arbosobo Leil Qiuxr**

Nael goxrsol-goxrnaxr pex dae car a; ca mel bei baxlfaxr nr zza car, ngo dder Arbosobo leil qiuxr doxr. Halleix ngo ssormaer mel cirkoxlpeix loxr a lei jjiumo ssi nr var. Ngua yar leil hormo maex lei i gger ssi a lei, yar leil i kor gger su ar ddei nr zza. No i gger su mel halae larhorhormo hal mel bbeix. Yel ngo dder hazzi cix, baxlfaxr lei nr zza. Yel ngo dder Silvu sser a, Arbosobo leil qiuxr a bbeix: “Arbosobo, ni ngo ssormaer leil ssi var lol arddeirnga a, ngo dder ni leil yix ar ddei seixl zol,” eine bbeix a. Ngua dax mel neir zi arddeirnga a mel, ngua dder yix seixl eine

bei, yel ngo lei zzirdae a, Arbosobo leil zi a mel, yar leil lei yix seixl zol nia eine zzirdae, yel ngo dder eine bbeix arddeir a.

### **3. Arbosobo Ngo Ssormaer Leil Ssi Var Lol**

Nael giedae mel baxr koxl sael loxr a, ngo ssormaer dder ssi var a. Yar jjiumo ssi a hormosael i nr zae bbeixarnar a; nael ngo halae yarzi ggese. Yar ssi nr var arddeirnga a, cirse lei yar leil ke lalnga, hazzi zoxlnixrddo, ngua ca vaer lei cix, eine zzirdae. Yel yar ssi var a ngo dder yarzi ggese. Nael ngo Arbosobo leil yix seixl zol nia eine bbeix goxr a lei, ngo seixl nr zol. Ngo zzirdae a, “Ngo zzi gga hher dae a mel ngo arddolmaex ssi a Arbosobo leil yix seixl zol ssi bbeixleir?” eine zzir. Yel ngo dder nr seixl a. Nael cirleixrleixr a ngo yoxl xiar du lei a bbeix: “Ngo doxl Arbosobo dax, yar ngo ssormaer leil ssi var lol arddeirnga a ngo dder yar leil yix seixl zol eine bbeix goxr a mar. Ngo mel ddar bbeix goxr a lei bei ci nr xie bbe,” eine zzir doxr. Nael ngo eil mel si dax biar a lei, si bbeix: “Eil ddei mel yar ssi zi ci a sael yar ssi var a nga arddeir a. Anix cirmel mel ssi lae ar mel zza eine bbeix. Yel ngo dder eine nga a zzirdae lalnga. Nael ngo eilcar Arbosobo leil saexl ho a

saelnei saexl. Eil ddei mel Arbosobo ngo ssormaer leil beijjiu a nga arddeir a. Niul Arbosobo leil nr zi bbeixarnar a Arbosobo mel zoxlzoxl a niul leil guaxr dae, yel ngo Arbosobo leil nawo a.

#### **4. Goxrsol-Goxrnaxr Zza A Lei, Biar Ggie Nr Zza**

Ngo Arbosobo leil nr saexl seir halleix mel nixixl goxr lei hazzi goxr sol, nixixl lei goxr nr var. Zoxlzoxl a lei arsaenga a miexr eine cer, arsaenga a eine nga var, eil zzu leil xiar doxr, yarzi cix; zoxlzoxl lei eine boxyox doxr. Armael zzirdae a armael mel hazzi seir, cirdoxr lei bei nr cox mar, eine zzirdae. Yel goxrsol-goxrnaxr zza a lei arseir dax biar ggie nr zza, si dax biar ssi bbeix zzael, si niul lei vae ssi var, halae niul leil i-nr-du. Arbbor ama dax biarbei zzael, yar cix leilei a gexr a, yaa dax biar nr bel. Yel dder gaxggor-carbeix mel dax biar lalnga. Nael cirmel mel a yaa lei niul leil beijjiu ci nr xie ar mel zza, yaa lei niul dax zoxlzoxl a hher dax dae nr cexr. Yaa niul leil arleixr cix jjiu var bbeixarnar, niul leil beijjiu nr cexr, niul cix dae mel vei pixl gger bbesur nr zza, yel yarzi goxr sol.

## **5. Arbosobo Leil Ddarzzi Su Gaxggoxr-Carbeix Ar Ddei Leil Saexl**

Nael giedae ngo gaxggor-carbeix ar ddei saexl a. Yar mel Arbosobo leil ddarzzi su a. Ngo yar dax cirgo a miar bei dae. Yar ngo leil Arbosobo ddei ddar seirseir mel biar gger. Yisu mel dder Arbosobo ddei ssor a, yar niul leil weix a, sixrzixljiaxl leil diexr zil a. Yel niul yar leil ddarzzi arddeirnga a mel, niul ddei ziuxl mel dder ssoxrsuxl a. Niul nixixl goxr a lei, yar leil qiuxr arddernga a, yar dder niul leil beijjiu var. Niul arddolcar si a lei niul dder merlabbor ddeix wo ddo. Yar leil ddar-nr-zzi arddernga a, niul si a mel dder dixlyuxl gga ssi nia, dixlyuxl gga mel adoxl herhelher bbiu dae a, cirse-cisil leil eine cu doxr nia, yarzi goxr sol,” eine biar gger a. Nael ngo mel halae ddar-nr-zzi, yar dax lei hormosael gaxggor nr dax.

## **6. Ngo Zzirdae A, Armael Mel Ziuxl Nr Zza**

Ngo zzirdae a, ngo yoxl ziuxl nr zza mei, ngo mel ca seir ar ddei a. Ngo si leil ker nr goxr, ca leil seixl nr goxr. Ngo ddei ziuxl ssoxrsuxl labox nr zza. Ngo dixlyuxl gga ssi nr ssa, eine zzir doxr. Yar ngo leil biar gger car a lei, halae yar dax zex doxr. Nael yar bbeix: “Ca mel arseir lei seir

gaxzi ar ddei nr zza, cirddei-hanga lei ziuxl zza, aniuxlsxor mel ye tor seir car, arseir lei yar leil nr seir bei mul gger nr ssa, yar dder bei ta saexl. Yel ca vaer mel halae yar leil seirseir bei mul gger nia. Yar dder ngo leil niul ca mel arddollei, arsaenga a ziuxl zza. Arsaenga a Arbosobo ddei ssor leil ddarzzi nia, eil zzu maelmaer ngo leil seirseir a biar gger a. Nael ngo halae hormosael ddar-nr-zzi.

## 7. Ngo Yoxrmo Bbeix Ggie Bbejjiur

Halleix ngo yoxrmo ngo leil bbeix gger goxr a bbeix: “Nguax dax eilmaex mel Arbosobo leil ddarzzi su ar mel zza, yaa leil mel Zidutuxr” eine bbeix. Yaa mel arsae arsae nga, yaa bei dae mel arsae arsae nga, eine bbeix. Noni dae a mel hormosael nr seir ar mel a. Yar halae ngo leil bbeix: “Yaa ni leil biar gger arddeirnga a lei ni ddarzzi nr ssa,” eine bbeix goxr a. Nael halleix ngo mel cirza lei nr saexl. Yel ngo zzirdae a, ngo gaxggor-carbeix eil ddei lei hal mel dax ciryoxr a nga, Yel dder yar dax hormosael gaxrggor nr dax.

## 8. Gaxggor-Carbeix Leil Ddar-Nr-Zzi

Giedae yar lei ngo leil yar dax cirgo jiaxlhuixl gga yaa lirbaexl bei ggie ssi, eine ae. Ngo zzirdae a, yar halmaex gga ca ar ddei ae mal a mel, yar zzirbae li wo ddo zzar, eine lei zzir goxr a. Nael eilcar a, xiar xixl leil a, ngo mel hazzi vaessiddo, hazzi medeil ca ar ddei a. Eil mel mel Arbosobo leil ddar-nr-zzi su ca mel lar xiar var. Yaa nixmox zzar zoxlzoxl zzirbae ddei leil lar xiar doxr a nga arddeir a. Ngo lei yaa mel cuaxrxia bei su ar mel zzar, eine lei zzir goxr a.

## 9. Gaxggor-Carbeix Mel Arsaе Nixixl Goxr Dae Mel Leil Mia

Giedae ngo zoxlzoxl a yar bei dae mel leil i dae. Yaa mel cirhhexr-lorbba lei Arbosobo leil ddarzzi su a. Yar capor nei yar yoxrpor lei Arbosobo leil ddarzzi su mel leil visser dae. Arbosobo leil nr saexl su mel i dae a, yar zzirbae hormosael nr zza bbeixarnar, nael yaa nixixl goxr dae mel, bir Arbosobo leil nr saexl su zzirbae be su mel leil goxr seir leixl. Yar capor mel yi lei nr dda, zzibbaer lei nr dda. Maerssor nei anix mel leil lei hazzi perniar. Yar yoxrpor yoxrmo lei yar leil hazzi perniar; azo bei lei zzizzi-bbebbe

a bei a, yar cirza-hanga lei zza. Yaa mel bir Arbosobo leil nr saexl su cal mel leil lei seir leixl. Arbosobo leil nr saexl su ca mel, armael leil lar xiar gger var, si leil xiar gger nr var. Si bir niul leil be a zzael, si leil nixnox; si bir niul leil sol a zzael, yaa leil vaessi, yaa leil i-nr-du, yaa leil ci. Yaa nixixl goxr a lei zoxlzoxl si dax bir doxr. Zzirbae nr zza zzael, ake ca leil curcix doxr; zzirbae ardoxr zza zzael, dur doxr; cirmel mel a halae ssormaerleixl zeil doxr. Ssormaer mel lei zzirbae leil weix a, buxlguaxr-laxlsixrmo bei doxr, eine nga. Yel zzirbae nr zza lei cix, zzirbae zza lei cix, eine nga. Yel Arbosobo leil ddar-nr-zzi su ca mel, nixixl goxr a, zzirbae ddei leil weix a goxr dae a lei hazzi goxr sol. Merxixl-merni lei hane sulku doxr, camu eil se mel arsaenga a gol dae lei nr saexl. Goxrsol-goxrnaxr pex dae lei koxl ggie lei nr zza, perniar su lei nr zza, eine nga. Yel cirmel mel a, ake ca dax bei hoxr nr ddo a xiar nr goxr a, naxcir dda a si su lei hazzi miur. Yel nixixl goxr a lei hazzi goxr sol. Nael ngo yaa arsaе nixixl goxr, arsaе anix mul, arsaе ca leil perniar, yaa capor maerssor mel arsaе zzi leil perniar, ngo leil lei hazzi pernia. Eil mel leil mia a dder yaa bei dae mel ngo bbejjiu wo goxr hal mel



dax le-nr-sel bbe, yaa mel hazzi seir ar mel a mar, eine zzir a.

## 10. Ngo Leil Nixixl Goxr Mul Gger

Yaa bbecir-bbeni lei Arbosobo dax ddar biar. Ngo yaa nixixl goxr dae mel hazzi seir ar mel a mia ho a lei, nael ngo mel halae hormosael ddar-nr-zzi. Yel yaa ngo leil biex a bbeix: “Ni leil Arbosobo dax arsaе ddar biar gger nia,” eine bbeix. Nael ngo mel yaa leil bbeix: “Biarddu nr zza,” eine bbeix. Ngo zzirdae a ngo goxrsol-goxrnaxr mel yaa dax biar arddeirnga a, yar ngo leil vaessi lalnga, eine zzir. Yel ngo dder yaa dax nr biar. Nael giedae yaa yilzi ngo leil eine perniar doxr, bir ngua ake ca leil lei perniar leixl. Zeixleixr lei ngo leil eil mel sael a perniar su nr zza. Yaa halae ngo leil nixixl goxr a, arsaе goxr nia, aniux mul a arsaе mul nia, maerssor mu a capor leil arsaе perniar nia, arsaе bei a sael capor dax toltor a nixixl goxr cexr. Zzirbae sser a arsaе sser nia, eil zzu ngo leil mul gger. Yel ngo dder zzizzi a ddarzzi dae a.

## 11. Ngo Leil Arbosobo Dax Ddar Biar Mul Gger

Yaa ngo leil bbeix gger a bbeix: “Ni goxrsol-goxrnaxr pex dae arddernga a, ni ddei ni Arbosobo dax biar ddo, yar ni leil beijjiu var.” Halae bbeix: “Ni Arbosobo ddei ssor Yisu mi ddei leil koxl dae a neir ggaxr cexr,” eine bbeix a. Yel giedae ngo dder zzizzi-zzizzi a Arbosobo dax arleixr biar sixr i a, yarzi nga nga bbe i.

## 12. Ngo Leil Yixrmeixssixr Lei

Cir xixl a ngo leil yixrmeixssixr lei, ca lei yili-hhelemo zoxlzoxl ngua yixr ggie ddirddir-dduxdduxmo mia. Yel yixr lei yixr nr seir, giedae cir nehe ngo dder ngo gaxggor-carbeix dax bbeix: “Armei ngo leil zoxlzoxl a yixrmeixssixr doxr, ca lei yili-hhelemo ngua yixr ggie gga ar mel ssi za doxr ggie mia, yel yixr lei yixr nr seir,” eine bbeix. Yar dder ngo leil bbeix gger a bbeix: “Ni yixr du car a, Yisu mi ddei leil koxl dae a neir ggaxr nia,” eine bbeix a. Yel giedae ngo dder bbecir-bbexixl lei yixr du car a, Arbosobo dax ddar biar a, neir ggaxr doxr. Giedae yarzi ngo leil dder yixrmeixssixr nr goxr a.

### 13. Ngo Ssormaer Sul Zza A, Arbosobo Ngo Leil Beijjiu

Ngo ssormaer mel halleix mel ngo yoxrmo yaa dax cirgo a hher dae a, ake halbbaer sul zza dae. Nael ngo yoxrmo yaa mel yar leil sul mul gger nr var. Yel ngo dder yar leil hier teixl lei a, yar leil ngua dax eilbbaer zza lei lol. Nael eilbbaer sul zza a mel boxlmixr a, hazzi boxl sol. Cirzahaंगा zexljixl mel sser nia, nael ngo mel zexljixl lei nr loxr. Ngo mel yar leil ngua ake dax naer ggie xiuxrxiaxl hal ddei gga zza ssi lol niazzir, xiuxrxiaxl hal ddei mel, zzocir lei halmaex zzor wo ddo. Yel ngo zzirdae a, yar halmaex zza ssi a mel hazzi seir. Ngo saxlba ggie mel ardoxr vimir, yel ngo dder yar leil zi doxr nr ssa a. Mercixl a xiaxlba ho a sael yar lei zi ssi ssa, eine zzirdae. Ngua hher ggie zzi eil ddei gga mel, xiuxrxiaxl gga zzorcir zzor wo ddo mel nnel lar zza. Yel ngua dder yar leil eilmaex zza ssi lol niazzir dae. Eine nga a mel, ngo dder saxlba wo ddo a, eine zzirdae. Nael giedae ngo xiuxrxiaxl gga boxlmixr ssi a mel, boxl lei boxl wo nr ddo. Cirddei-hanga lei ca zo a, zzirbbae ddux a saelnei boxl wo ddo. Cirmel mel a cirzahaंगा zexljixl zza su ca mel lei boxl nr wo. Sulmulsu mel eine nr hoxr hane nr hoxr eine bbeix a, cir ddei lei boxl nr

wo. Nael ngo mel zoxr-nr-zixr, ngo saexl, Arbosobo ngo leil beijjiu var, eine zzirdae. Ngo halae kebal ngua dax cirgo a boxlmixr ssi su hal ddei leil quex doxr. Nael ngo mel cirza-hanga zexljixl baxl a, yilgoxl xiqi beix za doxr a lei cirza lei baxl nr wo. Halleix dder baxl har dae hal mel lei sixrji ddei goxr ho a, sser nr cexr a bbe. Yel baxl box ssi a lei eil yoxr lei nr loxr hal yoxr lei nr loxr bbeix a, baxl box nr wo. Sul zza zi zzae ci niazzir dae a. Ngo yoxl cizixl gger dae a, Arbosobo dax ddar biar doxr. Halleix ngo mel hormosael saexl qi-nr-cur seir; arsae bei nia lei nr saexl. Giedae ngo dder ngo gaxggoxr carbeix mel leil dixlhuaxl ddaexr gger a, yaa dder cir ni cir ni ngo leil Arbosobo dax ddar biar gger doxr. Giedae ngo yoxl halleix piarsaexlsu ca ar ddei dax zzi a; yar bbeix yar leil zzirbae nrdu sael gger arddernga a, yar dder ngo leil beijjiu a, boxlmixr wo ddo, eine bbeix. Ngo zzirdae a, eil ddei mel dder Arbosobo ngo leil beijjiu arddeir a; eine zzirdae. Nael giedae ca eil ddei bbeix: “Ca mel loxr ho a; boxl wo nr ddo a, eine bbeix a. Yel ngo dder arsae bei nia lei nr saexl a. Giedae cir nehe ha du lei a, ngo gaxggoxr carbeix ddei ngo leil dixlhuaxl ddaexr gger a bbeix: “Ni nrnga nael eilbbaer niul saxlba ggje naer dae eil ddei gga arleixr boxl

ssi sixr i lar, armei ngo yixrmeixrka a, halmaex gga xiuxlzar ddei bbeix: “Yar dax halmaex halae ca nr loxr seir,” eine bbeix a. Halleix ngo mel xiuxrxiaxl hal ddei gga boxl ssi nia-nr-zzir, xiuxrxiaxl hal ddei mel hormosael naxr-nr-cixl. Halae zzocir lei halmaex zzor nr cexr, yel ngo saxlba arddeirnga a, anix zi su nr zza. Yel ngo dder hal ddei gga boxl ssi nia-nr-zzir. Nael eilcar baxlfaxr lei nr zza a. Giedae ngo dder halmaex boxl ssi a; nael halae boxl nr wo. Cirza-hanga zexljixl sser nia, yel ngo dder ngo saxlba ggie halmaex lei a, ngo gaxggor-carbeix mel ngo leil Arbosobo dax ddar biar jjiu lol. Yaa halae ngo leil zexljixl baxl jjiu. Giedae dder boxl dil wo a. Nael yar halmaex zza ssi cexr a lei, ngo halae cix doxr, yar halmaex zza ssi a mel, cir ni nr boxl ho, cir ni nr boxl zi nia. Eine nga a mel ngo lei seilseir a saxlba nr cexr, eine cix doxr. Nael xiar lei xiar nr ci, giedae cir nehe, ngo, ngo ssormaer leil ho ssi car a; xiuxrxiaxl dax naer dae yoxl’aexryuxr ar ddei a mel bbeix: “Yaa leil cir xiubbo leil zzirbae ardoxr gger a, yaa ngua leil zi gger ddo, halae halmaex zzocir zzor cexr, yel yaa ngua leil ho gger ddo, eine bbeix a. Yel ngo dder hazzi ggese. Ngo Arbosobo leil nawo a. Xiuxrxiaxl hal ddei mel hormosael mi-nr-ddux,

hormosael nr seir. Nael giedae ngo ssormaer halmaex cir koxl zza ho a mel, xiuxrxiaxl hal ddei dder kebal xiuxrxiaxl seirseir ar ddei dax cir ddei a loxr a. Bir halleix ngo yar leil zza ssi lol niazziir xiuxrxiaxl hal ddei leil lei seir leixl. Yel ngo dder hazzi ggese a, Arbosobo leil bbeixzae gger. Arbosobo mel niul nr saexl seir hal mel lei saexl ho a. Yar xiar dae mel bir niul xiar dae mel leil lei seir leixl, yar niul leil gger dae mel bir niul xiar dae mel leil lei seir leixl. Yel ngo Arbosobo leil nawo a. Halleix ngo mel Arbosobo leil ardoxr ddarzzi dae bbeixarnar a, nael ngo mel lirbaexl lei nr bei ssi, hane goxr ho a mel, ngo dder bbecir-bbegoxl xiqi lei lirbaexl bei ssi a. Yel ho bei ho dder Arbosobo leil hanol saexl dax a. Giedae Sexldaxljiexr leil ngo dder sexlsir a.

#### **14. Arbosobo Ngo Leil Beijjiu A Ake Ba**

Halleix ngua hher ggie halmaex mel ngo saxlba ggie nei ngo aniux sulzzaggie lei yarzi vimir. Yel ngo dder Arbosobo dax ddar biar a, ngo saxlba ggie naer ggie ar maex zo wo a. Ngua ake mel zzaegu lei yarzi miur, nael ngua leil xi zu gger su larbarniaxr ddei mel yar ngua leil zzaegu gga gger. Yel saluixrce gga li za gga a. Yel ngo

Arbosobo leil nawo a. Nrnga a ngua si leil qie a mel, cir boxl gga mel nrbbba nrzei pir sael nga nia. Arbosobo leixrga gga mel bei ci nr xie ciryoxr lei nr zza. Yel ngo yar leil nawo a. Nael giedae nr xiubbo sael goxr ho a, ngua hher ggie halmaex mel yaa zuaxiu box niazzir dae, yel ngua yoxl ba box nia a. Giedae ngo dder Arbosobo dax ddar biar a, ngo leil hher seir ddoddo arla ar maex zo wo lol. Nael giedae yarzi ngo nixmox zza xiar dae mel sael a hher seir ddoddo arla ar maex zo wo a.

### **15. Arbosobo Ngo Leil Cirza-Hanga Lei Beijjiu**

Arbosobo mel niul cirza-hanga sser ddu nr zza a lei yar saexl. Niul azo sser zoxr lei yar saexl. Niul yar leil ddarzzi a, niul mel dder yar ddei aniux loxr a. Yel niul nixixl goxr a mel yar leil koxl dae a mel gexrddu nr zza, niul goxrsol-goxrnaxr pex dae a yar dax ddar biar a mel, yar dder niul leil Beijjiu var, yar dder niul nixmox zza cixddu mel vei pixl gger var. Yel yar leil koxl dae a, niul dder ggeggesese a nixixl goxr lalssa. Yar ddei sul ber leil vaexr dae a bbeix: “Nia daxr bil du nr xie ca mel ngo dax eilmaex lei a, ngo nia leil bil gger dae var,” eine bbeix a. Yel ngo dder saexl, niul goxrsol-goxrnaxr pex dae var bbeixarnar, yar

niul leil guaxr gger dae a mel, nr seir hal mel pex dae a lei, yar halae seirseir loxr lol var. Yar niul daxr bil du nr xie mel niul leil bil dae lol nr var, yel yar leil koxl dae a, niul cirza lei cix nr ssa. Nr seir pex dae arddeirnga a lei, yar niul leil azo ar ddei zza wo lol niazzir a nga arddeir a. Yel dder yar leil qiuxr a, niul leil mul gger lol, niul leil saexl lol, eine qiuxr doxr lalssa a. Yel Arbosobo leil yarzi nawo a. Eine ar boxl a, ngo arzzi-nimo ar ddei a, yar mel Xilyiji ar ddei vae box a. Yel yar dder halleix hal jiaxl piar pixl gger niazzir dae, nael ngo gaxggor-carbeix ddei mel bbeix: “Yar piar pixl buxlqie ni vei si ddo a mar,” eine bbeix a. Yel ngo dder arzzi-nimo hal ddei dax bbeix: “Ni piar pixl buxlqie ngo leil gger ddo a mar,” eine bbeix a. Nael yar bbeix: “Eil ddei mel ngo cei koxl sael sser ho a; sser nr seir a. Ngo ni leil nr gger, ngo ni leil yarsixl ar ddei vae gger nia,” eine bbeix a. Ngo bbeix nr ssa, ni hal ddei ngo leil gger a dder ddo a,” eine bbeix a. Nael yar bbeix: “Ngo ni leil nr gger, ngo ni leil ar ddei vae gger nia,” eine bbeix a. Nael ngo arcixl jiax doxr a lei yar dax jiax nr wor. Yar bbeix: “Eil ddei mel Arbosobo ni leil gger arddeir a; yel ni vei dae nia, yel ni capor meixsaer qir leil Arbosobo leil middux gger lol nia. Ni Arbosobo leil nawo a dder ddo



a,” eine bbeix a. Yel giedae cir ni yar dder ngo leil hier dae a, Xilyiji ar jiaxl vae si lei a. Ngo xiar lei xiar nr ci, Arbosobo ngo leil einezeixl perniar. Yar ngo leil gger dae mel bir ngo xiar dae mel leil lei seir leixl. Yel ngo yar leil nawo jjia nr ddo. Ngo dder yar sul ber leil vaexr dae mel leil holcir du lei a; yar bbeix: “Nia hoba yar ddei goxr ddei leil qiuxr nei yar ddei seirseir mel leil qiuxr arddeirnga a, niul sser labox mel yar niul leil gger var,” eine vaexr dae. Arbosobo mel arsaе bbeix goxr mel dder arsaе bei ci, cirse-cirsil lei gierbox ni nr zza. Arbosobo leil nr saexl seir halleix ngua zoxlzoxl lei zzirbae sser loxr nr ddo, nael Arbosobo leil ddarzzi ho cirdae a, ngo lei seirseir a nixixl goxr dae a, cirza-hanga sser zoxr mel lei zza. Ngua zzirbae nr be bbeixarnar a, nael ngua azo sser zoxr mel Arbosobo dder ngua leil gger. Yel ngua cirza-hanga sserddu lei zza. Yel ngo Arbosobo leil nawo a. Arbosobo leil nr saexl seir halleix mel, ngo, ngo capor dax lei hormosael bei hoxr nr ddo, zoxlzoxl lei zzi hie doxr. Nael giedae ngo Arbosobo leil ddarzzi ho a, zoxlzoxl a yar dax ddar biar a, Arbosobo dder ngua nnel ddei nixmox taex lei gierbox gger a. Yel ngua dder zzicarzzi leil xiar gger var, zzircarzzi leil lei perniar var a; zzi dax lei bei hoxr

ddo a. Nixixl ddei lei ho bei ho goxr seir du lei a. Nael ngo Arbosobo leil ddar-nr-zzi arddernga a, ngo nixixl ddei arsaeng goxr mal ho a lei nr saexl a. Yel ngo Arbosobo leil nawo a.

## **16. Arbosobo Ngo Leil Dixldoxlcae Ar Jiaxl Gger**

Halleix ngo mel saxlba nei ngo ssormaer leil ho a lei daccæ zzaer lalnga. Nael zzizzi a mel, ngo ssormaer lei vaer du lei a, ngo dder zzaer du nr xie a. Yel ngo dder Arbosobo dax biar a, yar leil ngo leil dixldoxlcae ar jiaxl bei har gger dae lol. Giedae argielggur goxr ho a, ngo daccæ jiaxl xiaxr a zzaer nr cexr a. Nael hal cir xixlmei malmal ngo gaxggor-carbeix ar ddei a, ngo leil dixlhuaxl ddaexr gger a bbeix: “Ngo leil yaa dax arleixr ssi nia,” eine bbeix. Yel ngo dder yaa ake ssi a. Nael yar ngo dax azo bbeix ngo nr saexl. Nael xiar lei xiar nr ci, yaa bbeix: “Yar gaxggor-carbeix ar ddei a, yar leil dixldoxlcae ar jiaxl gger a. Nael yar sser nr zoxr, yar zzirdae a, ngo bir yar leil sser zoxr, yel yar dder ngo leil gger a. Ngo Arbosobo leil yarzi nawo. Ngo ca mel meixddur gga azo lei nr per bbeixarnar, nael yar halae ngo leil eine perniar. Yel Arbosobo leil na lei nawo jjia nr ddo. Yar ngo leil beijjiu dae mel lei bbeix lei

bbeix jjia nr ddo, yarzi miur. Yel cirmel mel a ngo lei hol-nr-cir a.

## 17. Ngama Arbosobo Leil Ddarzzi

Halleix ngama lei Arbosobo ar ddei zza saexl arnar a; yar leil nr zi, yar leil ddar-nr-zzi. Giedae ngo dder ngama leil Arbosobo ddei ddar seirseir mel yar leil biar gger. Nael ngo yar leil biar gger beil hal boxl yar hormosael ddar-nr-zzi. Yar yarzi nga nga nr saexl eine zzir. Ngo yar leil bbeix gger a bbeix: “Arbosobo leil ddarzzi a mel neir leil zi nr ddo, hexzzix doxl nr ddo,” eine bbeix. Nael yar mel zzirdae a, yar Arbosobo leil ddarzzi arddernga a mel, neir zi nr ddo a, neir zzu yar leil xix jjixr lei lei, eine zzirdae. Yel yar ddar-nr-zzi. Nael giedae ngo yoxl zeixleixr yar leil biar gger, yar halleix mel yarzi goxr sol, cixddu lei yarzi miur, almeixr lei zzor dil nr ddo, yixrmeixl lei jjiu nr ddo, eine cix doxr. Yel ngo dder yar leil zeixleixr Arbosobo ddei ddar mel yar leil biar gger, yar leil bbeix: “Ni cixddu mel Arbosobo dax biar cexr, yar ni leil beijjiu var, ngo ni ssormaer nga bbeixarnar, ngo mel zoxlzoxl ni dax hher dax dae nr cexr. Nael Arbosobo mel arddolcar lei ni dax hher dax dae cexr, yar halae ni leil beijjiu var. Niul neir

leil zi a mel, neir mel halae niul leil xix lei var, niul neir ho bbeixarnar, nael niul lei hazzi gexr, halae ho teixl ho nr teixl lei niul nr saexl, mia zzae niul mia nr ddo. Niul neir ggaxr lei ggaxr teixl ggaxr nr teixl niul nr saexl, deil zzae niul yar leil deil wo nr ddo. Nael niul Arbosobo leil ddarzzi arddernga a mel, niul dder yar ssor Yisu leil koxl dae a neir ggaxr cexr,” eine bbeix a. Ngama mel cix a yixrmeixl lei jjiu nr ddo a, yel ngo dder yar leil Arbosobo dax ddar biar gger a, yar hal cir xixlmei dder hazzi yixr seir. Nael eine nga a lei, yar halae hormosael ddar-nr-zzi seir. Nael giedae hal cir xixlmei mel ngo almeixr bei lel xi gga adoxl ga dae a, Arbosobo dax ddar biar doxr a, neir ggaxr doxr. Ngama nael halmaex gga qihher cir doxr. Ngabbor mel halleix dder nr zza ho a. Halcar malmal ngabbor mel ngama leil saexl lol a, ngo dax ddar biar lei niazzir, nael yar ngama leil saexl lol a bbeix: “Yar leil bbiur gex su ar mel zza, yel yar ngo dax biar wo nr xie,” eine bbeix zzor. Nael halcar ngama ngo dax nr bbeix. Giedae ngo eilbbaer jjixr ci ho a sael, ngama ngo leil dixlhuaxl ddaexr gger a sael ngo dax biar seir. Yel eine nga a saelnei ngama mel Arbosobo leil koxl dae a neir ggaxr cexr, eil mel leil ddarzzi seir. Giedae yar halae ngo dax bbeix: “Arbosobo

mel yarzi niul leil beijjiu var bbe. Arni ngo niur loxl ssi, nael ake mel silbbar ar mel lexl dae. Yel ngo halpiar gga almer lei si lei ggie mia a, ngo dder Arbosobo leil qiuxr a bbeix: “Arbosobo ngo mel ake silbbar ar mel lexl dae, ni leil qiuxr, eilcar ni almer tor nr lei lol seir, ngo jjixr a silbbar ddei arleixr vei du jjixr seir, ngo silbbar ddei vei du ho a saelnei almer lei lol,” eine bbeix a. Giedae yarzi almer nr lei a. Nael yar silbbar ddei jiajia vei du ho a dder almer vaer lei zeil a. Yel hane cirdae a ngama dder Arbosobo leil ddarzzi a. Yar ddarzzi ho a goxrsol-goxrnaxr halae pex dae seir bbeixarnar, nael yar Arbosobo leil koxl dae a, bbecir-bbeni lei hazzi ggesse, miar mu lei hazzi mu qirmi. Cir bber a lei hallae caxlgo caxl doxr. Yel ngadaxl i dae a lei yarzi murgur a bbeix: “Ama ni eilgielggur arsaе hazzi worni zzar?” eine bbeix a. Ngo lei ngama leil bbeix gger a bbeix: “Ngago moxrtoxrcae zzaer arddernga a, yar zzaer si a ngaseir, ni dder yar leil Arbosobo dax ddar biar gger nia, yel Arbosobo yar leil beijjiu a seilseir a nga lol,” eine bbeix a. Yel ngama dder arddolcar lei ngago leil Arbosobo dax ddar biar gger doxr. Nael Arbosobo leil yarzi nawo a; ngago Arbosobo leil ddar-nr-zzi bbeixarnar, nael yar

ngago leil arddolcar lei guaxr dae. Ngago moxrtoxr zzaer a, veixlbbor hormo boxl de lei nr saexl a; larhorhormo lei zae nr boxl sael de a. Nael Arbosobo yar leil guaxr dae a, yar ca ddei leil cir boxl lei bei nr no. Ngua dax cirmel mel a, hanezeixl de lar-nr-hor lei ca mel lei bei no jjia, eine nga. Yel ngo Arbosobo leil yarzi nawo a. Arbosobo sul ber leil bbeix goxr a bbeix: “Ake ca mel gga yar leil ddarzzi su ar ddei zza a, yar dder hal ddei leil weix a, cirhhexr-lorbba leil seir lol var,” eine bbeix a. Yel ngo Arbosobo leil nawo a.

## **18. Arbosobo Ngama Leil No Ggukor Gger**

Eine ar boxl a ngama mel ser no, almeixr lei zzor nr ddo, ajjix lei dda nr ddo, eine nga. Yel yar no i ssi a, naxcir dda lei guaxr-nr-zoxr. Geidae yar dder ngo leil dixlhuaxl ddaexr gger a, ngo dax bbeix: “Yar mel ser no, xiaxli hal nr ni sael yar lebbor jiataxr ddei dax ddeix a, koryi dol ssi a neir xix a xiaxli a. Yel ngo leil yar leil Arbosobo dax ddar biar jjiu nia,” eine bbeix. Yel ngo yar leil bbeix: “Neir xix arddeirnga a mel, niul dder Yisu mi ddei leil koxl dae a, neir ggaxr lalssa,” eine bbeix a. Ngo halae ngama leil neir ggaxr labox caxlgo hal ser caxl mul gger a neir ggaxr.

Yel ngama Arbosobo dax ddar biar a neir ggaxr doxr. Nael nr ni sael nga a lei halae nr kor. Yel ngama yoxl ngo leil dixlhuaxl ddaexr gger a bbeix: “Yar ser ddei halae no dae seir. Arbosobo dax biar a lei guaxr-nr-zoxr bbe,” eine bbeix. Nael ngo bbeix: “Ni naxcir lei dda nia, Arbosobo dax lei biar nia, yar ni leil cirza-hanga nr seir pex dae lol a mel, yar ni leil azo ar ddei saexl dax lol niazzir a nga arddeir a; yel ni zoxlzoxl yar dax ddar biar nia. Yar ni leil pex nr dae lol a mel, ni dder pex dae nr var.” Goxrsol-goxrnaxr eil mel lei Arbosobo dax lei nr nga, neir zzirmar dax lei arddeir a. Nael Arbosobo mel nr seir mel leil lei seirseir loxr lol var, yar ni leil beijjiu var. Yel ni yar leil qiuxr doxr a lalssa,” eine bbeix a. Yel giedae ngama dder zoxlzoxl Arbosobo dax ddar biar doxr.

Eine ar ni a, ngama yoxl ngo leil dixlhuxl ddaexr gger a bbeix: “Yar ser ddei kor ho a. Yar mel Arbosobo ddei sul ber leil vaexr dae ddar mel leil holcir du lei a. Arbosobo ddei sul ber leil bbeix: “Yuenaxr mel Arbosobo ddei ddar nr no a, yar Arbosobo leil pa a, Arbosobo dder ngol ar ddei leil miardal a, Yuenaxr leil ixl ji a.” Nael geidaae Yuenaxr zzasol zildu a, Arbosobo leil qiuxr a, Arbosobo

yoxl ngol ddei leil miardal a Yuenaxr leil hieltebbor peixl dol gger a. Gurlir eil ddei leil holcir du lei a. Yel ngama dder Arbosobo dax ddar biar a bbeix: “Arbosobo, ni mel ddo zzir ddei nga a; ni leixrga gga mel bei ci nr xie ciryoxr lei nr zza, bberzzi-bbermaer lei ni ddei ddar no bbe, ni leil qie, ngo leil serbberzzor dae bberzzi mel leil arleixr ggaxr pixl gger ssi, eine bbeix a, giedae yar ser no dae ddei dder kor a,” eine bbeix a. Ngo ngama eine bbeix ggie bbejjiur a, ngo dder yarzi ggese. Yel ngo Arbosobo leil nawo a.

### **19. Arbosobo Camar Ar Ddei Leil No Ggukor Gger**

Ngua dax mel camar eine ar ddei zza. Yar mel no a, meixddur lei mia nr xie, ssi lei ssi nr var so koxl nga a. Eine ar boxl a, yar mel no a, yiyuxl gga no i ssi, nael no i gger su mel bbeix: “I kor nr ddo a,” eine bbeix a. Yel yaa ake ca hhexr dder yar leil ake ba xixl a. Yel yar leil ba xixl hal cir ni, ngama dder ngo leil dixlhuaxl ddaexr gger a bbeix: “Ngua dax camar hal ddei mel no a, i kor nr ddo a; yel ba deix xixl lei a; eine bbeix ggie bbejjiur a.” Yel ngama dder ngo lei biex a bbeix: “Ngo, yar leil Arbosobo ddei ddar seirseir mel biar gger niazzir dae, yar leil biar



gger ddoddo?” ngo leil eine biex. Ngo bbeix: “Ddo mar, eine bei a mel yarzi seir a; ni yar leil biar gger ssi lar. Niul ca mel arseir lei arddol cir ni si var mel niul lei nr saexl, yel yar gol dae seir car a mel, ni yar leil biar gger ssi nia, si ho a mel biar gger ggaxr-nr-mae a. Eil ddei mel camu cirse zoxlyoxl zzir ddei nga a. Yel ni yar leil nialnga biar gger ssi nia. Niul eine bei a mel Arbosobo lei yarzi ggese, yar niul leil miardal goxr a bbeix: ‘Niul yar leil ddarzzi ho a mel, niul lei yar ddei ddar seirseir mel si leil biar gger ssi nia, yel cirddei-hanga leil lei Arbosobo leil saexl lei lol nia,’ eine bbeix goxr a. Yel ni eine bei a mel hazzi seir,” eine bbeix a. Giedae ngama dder yaa ake ssi a, Arbosobo ddei ddar seirseir mel yar leil biar gger ssi. Nael yar mel zeixleixr lei eil mel leil noni nr goxr a, yar noni dae a yarzi murgur, yel noni wo nr xie. Yar halae zzirdae a ngama mel nrhol-nrcir ar doxr zza zzar, eine zzirdae lalnga. Nael ngama mel bbecir-bbeni arsae jiur a lei, yar leil arcixl biar gger ssi eine nga. Camar hal ddei mel heixlceiqiuxl koxl nga a; yar lei yar leil i kor nr ddo saexl dder yarzi cix. Yar lei cirni-cirni hane no doxr, yel hazzi solzeixl. Ngama dder yar leil Arbosobo mel arseir a; niul ca mel arsaenga a yar leil ddarzzi nia, yar leil ddarzzi nei

Arbosobo ssor Yisu leil ddarzzi a mel, niul arddol lerler no a lei, no i su mel baxlfaxr nr zza arddeirnga a lei, niul yar leil qiuxr arddeirnga a yar lei niul lei i kor gger var. Nael niul naxcir dda zoxr a mel niul dder dda nia. Niul nixmox zzar cixddu zza arddeirnga a, niul yar dax biar a lei yar mel niul cixddu mel vei pixl gger var. Niul halae yar leil koxl dae a, neir ggaxr cexr. Niul si arddeirnga a lei merlabbor ddeix wo ddo, merlabbor mel cixddu lei nr zza, hazzi goxr seir, eine nga. Yel niul si zzorbbeixlei cix nr ssa. Nael yar leil ddar-nr-zzi a mel, niul dder neir zzirmar dax halmaex ssi nia, hherdder dixlyuxl gga nga a; halmaex mel cirse-cirsil lei adoxl cu dae a, yarzi goxr sol; eil mel yar leil biar gger. Halae yar leil Arbosobo dax ddar biar gger a, yar ggecir leil no dae mel vei pixl gger lol. Yisu mi ddei leil koxl dae a, yaa ake neir mel ggaxr pixl gger, eine nga. Nael cir boxl a, camar eil ddei mel xilbe no a, yar dder yaa ake ca mel leil miardal a, yaa leil neir i ssi lol. Yaa dder yar leil neir i gger ssi a. Nael neirisu ddei yar leil neir i gger a bbeix: “Nia dax neir nr zza bbe,” eine bbeix gger a. Yel neir i nr wo. Giedae camar hal ddei dder yarzi xiar du lei a bbeix: “Or, yar ngo leil eine biar gger a mel yarzi neir lei nr zza bbe, neir lei ho nr ssa bbe,”

eine xiar du lei a. Ngama zoxlzoxl a yar leil Arbosobo dax ddar biar gger a, yar ggecir leil no dae mel lei yarzi nr no a. Yel giedae zzizzi a yar dder ddarzzi a. Ngama dder yar leil sexlsir gger a. Yar halleix mel nixngaxddux a lei zoxlzoxl yar leil deix du lei nia, ca ddei lei hazzi zzu a, yel yar ggecir-ggemo zzu lei deix no jjia gger, eine nga. Nael giedae mel arseir lei xiar nr ci, yar ddei yar ha du lei a nixngaxddux var a. Yar halae lu ddei leil mox dae a armael ddei armael gieyi ddei dax ddux lei a cux dae var a. Ca ddei lei ho bei ho sexr du lei a, arzixl paxl du lei a. Yar lei zoxlzoxl a ngama leil yarzi jjiur, yar arddolcar lei ngama leil yar lei i ssi loxia, eine nga. Yar halae ngama dax bbeix a bbeix: “Ngo halleix dder ni eine bei var saexl arddernga a mel, ngo dder einezeixl no sulku nr ssa bbe, ngo mel hormo solzeixl si lei a,” eine bbeix a. Nael ngama mel yar leil bbeix gger a bbeix: “Eil ddei mel ngo bei nr nga a nei Arbosobo bei arddeir a. Halleix mel ngo lei Arbosobo leil nr saexl seir, ngo yar leil saexl neixr arddeirnga a, ngo lei eine goxr sol si lei nr ssa a; halleix ngo lei moxrneixl-cixlhoxrmo eine goxr doxr. Nael eilboxl ngo Arbosobo leil saexl ho a, ngo lei goxr seir a,” eine bbeix a. Ngo ddar eil mel leil bbejjiu a, ngo lei yarzi ggese.

Bir piu sae cirke ggux wo leil lei ggese leixl. Ngo saexl, niul middurbbor goxr dae a mel, zzirbae ddei leil weix a gol dae nr nga, Arbosobo leil weix a gol dae arddeir a. Yel ngo Arbosobo leil nawo a, yar lei bbeixzae gger. Camar eil ddei ba xixl lei cirdae a eilleix ci a mel yoxl cir koxl sael nga ho a. Yar eilleix lei zzazza-soso a zza dae seir. Yel ngo eil mel leil mia a dder yarzi ggese, ngo Arbosobo leil yarzi nawo a.

## 20. Arbosobo Ngago Leil No Ggukor Gger

Halleix ngago mel no a, no i ssi. Nael no i su mel bbeix: “Yar nixmoxzo ddei pexl dae, halae xuexryaxr ga, yel yar leil zuxlyuxl nia,” eine bbeix a. Nael yar mel zzirbae nr zza a zuxl-nr-yuxl ssi. Yel yar cirni-cirni yixr dae lalnga. Giedae ngama ngo leil dixlhuaxl ddaexr gger a ngo dax biar. Yel ngo dder yar leil bbeix: “Ni Arbosobo dax ddar biar lalssa, yar nia leil beijjiu var. Nia zzirbae nr zza a mel, Arbosobo saexl. Yel ni Arbosobo dax ddar biar a, bbeix: ‘Ngago mel no, nael ngua mel zzirbae lei nr zza, yel ngua arsaе bei nia nr saexl. Ni leil qiuxr, ni ngua leil beijjiu la, ni yar leil zuxlyuxl ssi lol niazzir dae arddeirnga a, ni ngua leil cirza-hanga bei har gger dae la. Ni yar lei i

kor gger niazzir dae arddernga a, ni dder yar leil kor lol la,” eine biar mul gger a. Yel giedae ngama dder ngago leil Arbosobo dax ddar biar gger a, giedae nr ni sael goxr ho a, yar no ddei dder kor a. Yel ngo yarzi ggese a, Arbosobo leil nawo a.

## **21. Arbosobo Ca Leil No Ggukor Gger**

Ngua cirssor eine ar ddei zza. Yar halleix Arbosobo leil nr saexl seir mel neirsaermo ar ddei a. Nael cir boxl a, yar mel qihher no, naxcir dda lei guaxr-nr-zoxr. Eine ar boxl yar mel ngama dax zzi a; yel ngama dder yar leil Arbosobo dax ddar biar gger, halae Arbosobo mel arseir a yar leil biar gger. Yar lei ddarzzi niazzir dae, nael halleix mel, ngama mel Arbosobo ddei ddar mel leil hormosael nr saexl seir, yel yar leil lalal a ardoxr biar gger lalnga. Nael ngama mel yar leil bbeix: “Arddolcar a; ngo ssormaer jjixr lei a, ni leil zeixleixr Arbosobo ddei ddar mel biar dax gger lol, ngo mel hormosael biar nr var seir,” eine bbeix a. Nael giedae mel yar qihher ddei murlil-murgurmo dder kor a. Yel yar dder Arbosobo mel yarzi a bbe, eine zzir. Yar lei hazzi ngo dax zzi niazzir. Yel Arbosobo ddei ddar mel leil noni niazzir. Giedae eine

ar boxl a, ngo mel ake jjixr a seivi mu jjixr, yel hal boxl yar lei seivi mu lei a. Giedae yar dder ngo leil biar gger a bbeix, halleix mel yar mel qihher no, nael ngama mel yar leil Arbosobo dax ddar biar gger a, giedae yar qihher ddei mel yarzi kor a. Yar dder Arbosobo mel yarzi nga bbe saexl a. Yar lei hazzi Arbosobo leil ddarzzi niazzir. Nael yar arsaе bei nia nr saexl, eine bbeix a. Yar bbeix, yar zzirdae a, nrbbba eil se lei ngo leil mia nixixl nr zza piar a, eine zzir doxr. Nael eilboxl ngo leil mia ddo a mel yar xiar lei xiar nr ci, eine bbeix a. Yel yar dder ngo leil yar leil Arbosobo leil ddarzzi a mel arsaе bei nia mul gger lol. Giedae ngo dder yar leil Arbosobo mel arseir a; arsaenga a niul ca mel Arbosobo leil ddarzzi nia, Arbosobo leil ddarzzi a mel arsaе bei nia. Yisu mel arseir a, yar niul leil weix a goxrsol-goxrnaxr cirke goxr a, yel niul yar leil ddarzzi a saelnei Arbosobo dax ddar biar cexr. Eil zzu maelmaerjjia yar leil biar gger a. Halae yar leil bbeix: “Niul Arbosobo leil ddarzzi a mel, niul dder neir zi nr ddo a; niul neir zi a mel Arbosobo vuxryixr. Nael niul Arbosobo ssor Yisu leil koxl dae a, neir ggaxr cexr. Yel niul neir mel leil gexr nr ssa,” eine bbeix gger a. Yar dder bbeix: “Ngo Arbosobo leil ddarzzi yuex, eilboxl ngo

zeixleixr lei neir nr zi a.” Yar halleix neir zi a mel yar baxlfaxr nr zza a zi arnar a. Neir zzu mel yar leil cor peixlfuxr gger a, eine bbeix a. Yel giedae yar dder Arbosobo leil ddarzzi a. Nael eine ar boxl a ngama ngo leil dixlhuaxl ddaexr gger a bbeix: “Niul ddei cirssor hal ddei mel feixljiexrhiexr no a, i kor nr ddo zzor. Yel ake ba xixl ci dae a; eine bbeix ggie bbejjiur a; yel ngo yar leil arleixr i ssi niazzir dae. Yar mel Arbosobo leil ddarzzi ho a bbeixarnar, nael Arbosobo ddei ddar mel halae hormosael nr saexl seir. Yar halae sexl-nr-sir seir. Yel ngo ssi a, yar leil Arbosobo ddei ddar mel zeixleixr biar dax gger ssi nia, halae yar leil sexlsir gger ssi nia. Yar leil Arbosobo dax ddar biar gger a, Arbosobo yar leil no ddei i kor gger lol nia, eine bbeix. Giedae ngama dder yarzi yar leil i ssi a; yar leil zeixleixr Arbosobo ddei ddar mel yar leil biar dax gger a; halae yar leil sexlsir gger a. Yoxl yar leil Arbosobo dax ddar biar gger a, yar ddei no ddei kor lol, eine biar a. Yel giedae ngama dder jjixr lei a. Nael nr ni sael goxr ho a, ngama yoxl yar leil dixlhuaxl ddaexr gger a, yel yar bbeix, yar no ddei ardoxr kor ho a, eine bbeix a. Yel ngama dder ngo leil bbeix gger a, ngo lei yarzi ggese. Ngo saexl eil ddei mel Arbosobo yar leil i kor gger

a nga arddeir a. Yel ngo Arbosobo leil nawo a. Giedae nr ni sael goxr ho a, ngama yoxl yar leil biex a, yar bbeix, yar no ddei kor ho a; yel miar bei doxr a, eine bbeix a. Yel ngo lei Arbosobo leil nawo a, yar leil bbeixzae gger.

## 22. Camu Eil Se Seir Zzir Ddei

Ngo eilleix Arbosobo leil saexl ho a, ngo Arbosobo leil yarzi nawo a. Ca mel i dae a, ngo azo lei nr suax, azo lei nr per; sul lei hormosael nr saexl; zzirbae lei nr zza bbeixarnar, nael Arbosobo halae ngo leil einezeixl perniar, ngo leil cassor-worssor mel gga tiur teixl lei a, ngo leil yar leil saexl lei lol, yar ddei ssormine loxr lol, goxrsol-goxrnaxr pex dae a lei, yar leil koxl dae cexr. Yar halae ngo leil zoxlzoxl a guaxr dae a nr seir mel pex nr dae lol, ngo cirza-hanga sser zoxr mel ngo leil gger. Ngo leil yar leil koxl dae a nixixl goxr lol, ngo leil zoxr-nr-zixr lol. Ngo daxr bil du nr xie mel ngo leil pex nr dae lol. Arddol hher dae lei yar ngo dax ca dae, ngo cix dae car, yar ngo leil cixddu mel vei pixl gger, goxr sol car ngo leil beijjiu. Ngo yar leil saexl ho cirdae a, arddolcar a ci lei yar ngo leil eine perniar. Yel ngo yar leil saexl ho a mel, ngo bbecir-bbeni lei yar leil koxl dae a nixixl goxr. Eine



nga a mel, ngo dder jjiumo ssi cox nr var a. Waxlhuixrddu lei ho bei ho nganiul a; nael ngo waxlhuixrddu ar ddei zza, hherdder ngo arsaenga a, halleix ye tor seir dder Arbosobo leil nr saexl? Ngo halleix dder Arbosobo leil saexl arddeinga a, ngo camu eil se dder einezeixl goxr sol nr var a; eine waxlhuixr doxr. Halleix ngo Arbosobo leil hormosael a nr saexl seir, arzzi-nimar, arzzi-nimo mel eine bbeix a, ngo noni dae a, yarzi murgur, nael eilboxl yaa eine bbeix a ngo dder saexl a. Arseir lei yaa Arbosobo leil ddarzzi a waxlhuixr a; eine bbeix su nr zza. Arseir lei ngo yar leil saexl lae ho a, ngo waxlhuixr a, eine bbeix lalnga. Nael ngo saexl, Arbosobo ca leil tiur a mel yar ddei yar nixixl ar ddei zza, yel ngo lei Arbosobo leil nawo a. Arbosobo leil saexl su mel arseir lei bbeix: “Camu eil se seir zzir ddei mel hherdder Yisu leil ddarzzi cexr; camu eil se seir zzir ddei mel hherdder Yisu leil koxl dae cexr. Niul middurbbor hher dae a lei yar leil koxl dae cexr. Arddolcar si a lei halae merlabbor ddeix a, yar dax cirgo a hher dae cexr. Yel niul si arddernga a lei cix nr ssa, gexr nr ssa, halae yarzi ggese.” Yel cirddei-hanga lei zzirdae a camu eil se seir zzir ddei mel dder Yisu leil ddarzzi cexr. Nael Arbosobo leil nr saexl su ca mel hazzi zoxlnixrddo.

Hherddeir anix mel arbbor ama nr zza, guaxr su lei nr zza mel sael a nga. Yel yaa nixixl goxr a lei armael xiar dae mel dax zox dae a goxr lalnga, yaa zzirdae a camu eil se seir zzir ddei mel dder zzirbae cirke zza, yarzi be eine nga a mel dder seir a, eine zzirdae. Yel yaa merxixl-merni lei hane sulku doxr. Halae zoxlzoxl si dax bir doxr, yel nixixl goxr a lei hazzi goxr sol. Nael yaa arsaenga a gol dae lei nr saexl. Yaa zzirdae a ngo nr si hozze mel dder gol dae, eine xiar lalnga. Yaa armael gol dae a mel azo yilsi zza lei nr saexl. Yaa goxr sol car a dder camu nia-nr-zzir a armael leil bei zil gger. Yaa zzirdae a si ho a mel dder cirza lei bei nr ssa a, goxr seir ddo, eine zzir lalnga. Yaa si ho a caxiu ddei yiji gga ssi nia lei saexl. Nael yiji gga arsaesael goxr sol mel yaa nr saexl. Yaa goxrsol-goxrnaxr pex dae a lei armael sser gex dae nia, armael ddei armael baxlfaxr xiar nia. Yaa Arbosobo leil nr saexl a mel, zoxlzoxl a lei neir zi doxr. Yaa zzirdae a, yar neir mel leil zi a mel, neir mel dder yaa leil cirza-hanga guaxr gger dae var. Yaa leil cirza-hanga seir lol var, eine zzirdae. Yel yaa neir mel leil yarzi gexr, neir mel yaa leil xix lei a lei neir ho doxr, neir ggaxr doxr. Yaa neir mel leil zi doxr, neir mel leil ho doxr bbeixarnar a; nael yar mel

neir leil yarzi gexr. Nael eine nga bbeixarnar a; yaa halae neir ddar no, yel azo nr seir pex dae arddeirnga a yaa dder neir i doxr. Yel neir mel yar leil arsae bei nia bbeix a, yaa dder arsae bei doxr. Ca cirmelmel a neir ddar no a, xi zi har dae mel lei caexr xiaxr jjia gger a, yel nixixl goxr a lei hazzi goxr sol. Cirmelmel a nael neir zzu yaa leil cor lei doxr, yel ake ca mel leil zoxlzoxl zzi dax bei hoxr nr ddo, zzihie-zzinoxlmo eine nga lol. Yaa lei baxlfaxr lei nr zza, neir ho a lei, ho teixl ho teixl nael yoxl jjixr lei, ho lei ho teixl nr ddo, ggaxr lei ggaxr teixl nr ddo, deil zzae deil wo nr ddo. Yel ca mel lei yarzi zoxlnixr ddo, eine nga.